



Կարգապահական գործ թիվ ԿԳ-18084

Հայաստանի Հանրապետության փաստաբանների պալատի խորհրդի
2018 թվականի հուլիսի 7-ի թիվ 165-րդ ԿԳ նիստի

Ո Ր Ո Շ ՈՒ Մ ԹԻՎ ԿԳ/124-Ա

ՓԱՍՏԱՔԱՆ ՎԱՀԵ ԿԱԿՈՅԱՆԻՆ ԿԱՐԳԱՊԱՀԱԿԱՆ ՊԱՏԱՍԽԱՆԱՆԱՏՎՈՒԹՅԱՆ ԵՆԹԱՐԿԵԼՈՒ ՀԱՐՑԸ ՔՆՆԱՐԿԵԼՈՒ ՄԱՍԻՆ (ՎԵՐԱՊԱՏՐԱՍՏՄԱՆ ԴԱՍԸՆԹԱՅՆԵՐԻ ԳՈՐԾՈՎ)

Հայաստանի Հանրապետության փաստաբանների պալատի (**այսուհետ նաև՝ Պալատ**) խորհուրդը (**այսուհետ նաև՝ Խորհուրդ**), նիստը նախագահող Տիգրան Խուրշուդյանի, Խորհրդի անդամներ՝ Կարապետ Աղաջանյանի, Նելլի Հարությունյանի, Արայիկ Ղազարյանի, Կարեն Սարգսյանի և Կարեն Մեծլումյանի կազմով,
քարտուղարությամբ Նոննա Համբարձումյանի,
քննության առնելով փաստաբան Վահե Կակոյանին (արտոնագիր՝ թիվ 1445) կարգապահական պատասխանատվության ենթարկելու վերաբերյալ հարցը,

Պ Ա Ր Զ Ե Ց՝

1. Կարգապահական վարույթ հարուցելու առիթը և հիմքը.

«Հայաստանի Հանրապետության փաստաբանական դպրոց» հիմնադրամի (**այսուհետ նաև՝ Դպրոց**) կողմից 16.03.2018թ. ներկայացված տեղեկանքի համաձայն՝ փաստաբան Վահե Կակոյանը (**այսուհետ նաև՝ Պատասխանող**) 2017թ. երկրորդ կիսամյակի (հուլիսից դեկտեմբեր (ներառյալ)) ընթացքում չի մասնակցել պարտադիր վերապատրաստման դասընթացներին և չի լրացրել պարտադիր վերապատրաստման որևէ ժամ:

2. Կարգապահական վարույթ հարուցելու մասին որոշումը.

ՀՀ փաստաբանների պալատի նախագահի առաջին տեղակալի 19.03.2018թ. թիվ 154-Ա/ԿԳ-18084 որոշմամբ կարգապահական վարույթ է հարուցվել փաստաբան Վահե Կակոյանի նկատմամբ՝ «Փաստաբանության մասին» ՀՀ օրենքի (**այսուհետ նաև՝ Օրենք**) 19-րդ հոդվածի 1-ին մասի 4.1 կետի, 45.12-րդ հոդվածի 2-րդ մասի և Պալատի ընդհանուր ժողովի կողմից 11.02.2012թ. թիվ 1/4-Լ որոշմամբ հաստատված

Փաստաբանի վարքագծի կանոնագրքի (այսուհետ նաև՝ **Կանոնագիրք**) 2.8.2 ենթակետի խախտման հատկանիշներով:

20.03.2018թ. կարգապահական գործը հանձնվել է Պալատի խորհրդին:

Խորհրդի նիստը տեղի է ունեցել 2018 թվականի հուլիսի 7-ին, ժամը՝ 12:56-ին, ՀՀ փաստաբանների պալատի վարչական շենքում (ք.Երևան, Զաքիյան 7-2, 4-րդ հարկ, թիվ 12 սենյակ):

3. Պատասխանողի համառոտ բացատրությունը.

29.03.2018թ. Պալատ մուտքագրվել է փաստաբան Վահե Կակոյանի դիմումը, որի համաձայն Վահե Կակոյանը պարտավորվում է հաշվետու կիսամյակում չանցած վերապատրաստման դասընթացների ժամերն իր հաշվին լրացնել հաջորդ կիսամյակում և խնդրում է այդ հիմքով իր նկատմամբ հարուցված կարգապահական վարույթը կարճել:

Փաստաբան Վահե Կակոյանը թեև պատշաճ ծանուցվել է կարգապահական նիստի վայրի, օրվա և ժամի մասին, սակայն Խորհրդի նիստին չի ներկայացել:

4. Գործի հանգամանքները՝ առկա ապացույցների վկայակոչմամբ.

Պալատի խորհուրդը՝ ուսումնասիրելով գործում առկա գրավոր փաստաթղթերը, հաստատված է համարում հետևյալ փաստերը.

1) 2017թ. երկրորդ կիսամյակի (հուլիս-դեկտեմբեր (ներառյալ)) ընթացքում Պալատի, Դպրոցի և Պալատի կողմից սահմանված կարգով հավաքարձագրված կազմակերպությունների կողմից կազմակերպվել է 111 (մեկ հարյուր տասնմեկ) վերապատրաստման դասընթաց:

Նշված փաստը հաստատվում է Պալատի աշխատակազմի ղեկավարի և վերապատրաստման հարցերով համակարգողի 06.07.2018թ. տեղեկանքով:

2) 2017թ-ի երկրորդ կիսամյակի (հուլիսից դեկտեմբեր (ներառյալ)) ընթացքում Վահե Կակոյանը չի մասնակցել պարտադիր վերապատրաստման դասընթացներին և չի լրացրել պարտադիր վերապատրաստման որևէ ժամ:

Նշված փաստը հաստատվում է Դպրոցի 16.03.2018թ. տեղեկանքով:

3) Փաստաբան Վահե Կակոյանի նկատմամբ սահմանված կարգով և ժամաքանակով վերապատրաստման դասընթացներին չմասնակցելու հիմքով նախկինում կարգապահական վարույթ չի հարուցվել:

Նշված փաստը հաստատվում է Պալատի ընդհանուր դեպարտամենտի ղեկավարի կողմից 06.07.2018թ. տրամադրված տեղեկանքով:

4) Փաստաբան Վահե Կակոյանը պարտավորվել է հաշվետու կիսամյակում չանցած վերապատրաստման դասընթացների ժամերն իր հաշվին անցնել հաջորդ կիսամյակում:

Նշված փաստը հաստատվում է 29.03.2018թ. դիմումով:

5. Պատասխանողի անձը բնութագրող հանգամանքները.

Պալատի ընդհանուր դեպարտամենտի ղեկավարի կողմից 06.07.2018թ. տրամադրված տեղեկանքի համաձայն՝ Վահե Կակոյանը փաստաբան է հանդիսանում 14.07.2012թ., և 2015-2018թթ. ընկած ժամանակահատվածում նրա նկատմամբ վերապատրաստման դասընթացներին չմասնակցելու հիմքով կարգապահական վարույթ չի հարուցվել (չհաշված սույն կարգապահական վարույթը):

6. Պալատի խորհրդի պատճառաբանված եզրակացությունը և որոշումը.

Հիմք ընդունելով Պալատի խորհրդի կողմից հաստատված փաստերը, դրանք հիմնավորող գործում առկա ապացույցները և քննարկվող իրավահարաբերությունները կարգավորող կանոնները, Պալատի խորհուրդը գտնում է, որ փաստաբան Վահե Կակոյանի նկատմամբ հարուցված կարգապահական վարույթը ենթակա է կարճման՝ հետևյալ պատճառաբանությամբ.

Փաստաբանների վերապատրաստման հետ կապված հարաբերությունները կարգավորվում են «Փաստաբանության մասին» ՀՀ օրենքի, Հայաստանի Հանրապետության փաստաբանների պալատի կանոնադրության, Փաստաբանի վարքագծի կանոնագրքի և Պալատի խորհրդի 18.12.2014թ. թիվ 35/8-Լ որոշմամբ նոր խմբագրությամբ հաստատված «Փաստաբանների վերապատրաստման» կարգի (այսուհետ նաև՝ Կարգ) դրույթներով:

Օրենքի 19-րդ հոդվածի 1-ին մասի 4.1 կետի համաձայն՝ փաստաբանը պարտավոր է՝ ... 4.1) սահմանված կարգով և ժամաքանակով մասնակցել սույն օրենքով նախատեսված վերապատրաստման դասընթացներին:

Օրենքի 45.12-րդ հոդվածի 2-րդ մասի համաձայն՝ փաստաբանը պարտավոր է անցնել փաստաբանների պալատի խորհրդի սահմանած կարգով և ժամաքանակով վերապատրաստման դասընթացներ, որոնք չեն կարող երկու փարվա ընթացքում քառասունութ ժամից պակաս լինել:

Հայաստանի Հանրապետության փաստաբանների պալատի կանոնադրության 16.5 կետի 24-րդ ենթակետի համաձայն՝ Պալատի խորհուրդը, որպես գործադիր մարմին հաստատում է փաստաբանների վերապատրաստման կարգը:

Կանոնագրքի 2.8.2 ենթակետը սահմանում է, որ փաստաբանը պարտավոր է Պալատի խորհրդի կողմից սահմանված կարգով և ժամաքանակով մասնակցել Օրենքով նախատեսված վերապատրաստման դասընթացներին:

Կարգի 1-ին կետի համաձայն՝ կարգը սահմանում է փաստաբանների վերապատրաստման դասընթացներ անցնելու ընթացակարգը, ժամկետները, ժամերի հաշվարկը, պարասխանադրության, հաշվետվողականության, ինչպես նաև վերապատրաստման հետ կապված այլ հարաբերությունները:

Կարգի 8-րդ կետի համաձայն՝ յուրաքանչյուր կիսամյակի (վեց ամսվա) համար փաստաբանը՝ Կարգով նախատեսված ժամկետում և ընթացակարգով, պետք է անցնի 12 (տասներկու) ակադեմիական ժամ (այսուհետ՝ ժամ, 1 (մեկ) ակադեմիական ժամը հավասար է 40 (քառասուն) րոպեի) վերապատրաստում: Կիսամյակի հաշվարկը՝ ա) սկսվում է հունվար ամսից և ավարտվում հունիսին (ներառյալ, կամ բ) սկսվում է հուլիս ամսից և ավարտվում դեկտեմբերին (ներառյալ):

Կարգի 27-րդ կետի համաձայն՝ կարգը խախտելու համար փաստաբանը ենթակա է կարգապահական պատասխանատվության՝ «Փաստաբանության մասին» Հայաստանի Հանրապետության օրենքով և Փաստաբանի վարքագծի կանոնագրքով սահմանված կարգով:

Կարգի 30՝ կետի համաձայն՝ եթե փաստաբանը գրավոր դիմում (այդ թվում էլ եկտրոնային փոստի միջոցով) է ներկայացնում Պալատին՝ պարտավորվելով հաշվետու կիսամյակում չանցած վերապատրաստման դասընթացների ժամերն իր հաշվին անցնել հաջորդ կիսամյակում, ապա՝ ... վերապատրաստման դասընթաց չանցնելու հիմքով փաստաբանի նկատմամբ առաջին անգամ հարուցված կարգապահական վարույթը կարճվում է:

Նշված կանոնների վերլուծությունից հետևում է, որ փաստաբանը պարտավոր է անցնել վերապատրաստման դասընթացներ, որոնք չեն կարող երկու տարվա ընթացքում 48 ժամից պակաս լինել, իսկ Պալատի խորհուրդը որպես գործադիր մարմին սահմանում է փաստաբանների վերապատրաստման կարգը և ժամաքանակը: Սահմանված ժամկետում վերապատրաստման դասընթացներին չմասնակցելու համար փաստաբանը ենթակա է կարգապահական պատասխանատվության: Սույն կանոնից բացառություն է կազմում այն դեպքը, երբ փաստաբանի նկատմամբ նախկինում վերապատրաստման դասընթացներ չանցնելու հիմքով կարգապահական վարույթ չի հարուցվել, և փաստաբանը Պալատին գրավոր դիմում է ներկայացնում՝ պարտավորվելով հաշվետու կիսամյակում չանցած վերապատրաստման դասընթացների ժամերն իր հաշվին լրացնել հաջորդ կիսամյակում: Այդ պարագայում փաստաբանի նկատմամբ հարուցված կարգապահական վարույթը կարճվում է:

Փաստաբան Վահե Կակոյանի նկատմամբ սույն կարգապահական վարույթը հարուցվել է այն հիմքով, որ վերջինս, խախտելով «Փաստաբանության մասին» ՀՀ օրենքի 19-րդ հոդվածի 1-ին մասի 4.1 կետի, 45.12-րդ հոդվածի 2-րդ մասի և Կանոնագրքի 2.8.2 ենթակետի և Կարգի 8-րդ կետի պահանջները, 2017թ. երկրորդ կիսամյակի (հուլիսից դեկտեմբեր (ներառյալ)) ընթացքում չի մասնակցել պարտադիր վերապատրաստման դասընթացներին:

Պալատի խորհուրդն արձանագրում է, որ 2017 թվականի հուլիս-դեկտեմբեր (ներառյալ) ամիսներին Պալատը կազմակերպել է 111 (մեկ հարյուր տասնմեկ) վերապատրաստման դասընթաց (չհաշված առցանց վերապատրաստման դասընթացները): Ընդ որում, թեմաները նախապես հաստատված և տեղադրված են եղել Պալատի կայքում, ինչպես նաև յուրաքանչյուր ամսվա դասացուցակները հաստատվել և տեղադրված են եղել Պալատի կայքում:

Մինչույն ժամանակ Պալատի խորհուրդը հիմք է ընդունում Պալատի ընդհանուր դեպարտամենտի ղեկավարի 06.07.2018թ. տեղեկանքն առ այն, որ նախկինում փաստաբան Վահե Կակոյանի նկատմամբ վերապատրաստման դասընթացներին չմասնակցելու հիմքով կարգապահական վարույթ չի հարուցվել, ինչպես նաև 29.03.2018թ. Պալատ մուտքագրված դիմումը, որով Վահե Կակոյանը պարտավորվում է հաշվետու կիսամյակում չանցած վերապատրաստման դասընթացների ժամերն իր հաշվին լրացնել հաջորդ կիսամյակում:

Նման պայմաններում Պալատի խորհուրդը գտնում է, որ փաստաբան Վահե Կակոյանի նկատմամբ հարուցված կարգապահական վարույթը ենթակա է կարճման:

Ելնելով վերոգրյալից և ղեկավարվելով «Փաստաբանության մասին» ՀՀ օրենքի 10-րդ հոդվածի 5-րդ մասի 14-րդ կետի, 39.7-րդ հոդվածի 5-րդ մասի 2-րդ կետի, «Հայաստանի Հանրապետության փաստաբանների պալատի կանոնադրության» 16.26-րդ կետի, Կանոնագրքի հավելվածը հանդիսացող «Փաստաբանի նկատմամբ կարգապահական վարույթի իրականացման կարգի» 30-րդ հոդվածի 5-րդ մասի 2-րդ կետի, Կարգի 30.¹ և 30.³ կետերի պահանջներով, Պալատի խորհուրդը

Ո Ր Ո Շ Ե Ց

1. Փաստաբան Վահե Կակոյանի (արտոնագիր՝ թիվ 1445) նկատմամբ 19.03.2018թ. թիվ 154-Ա/ԿԳ-18084 որոշմամբ հարուցված կարգապահական վարույթը կարճել՝ փաստաբանի նկատմամբ «Փաստաբանների վերապատրաստման» կարգի 30.¹ կետով սահմանված արտոնությունը կիրառելու հիմքով:

2. Հանձնարարել Պալատի աշխատակազմի ղեկավարին՝ սույն որոշման մասին իրազեկել փաստաբան Վահե Կակոյանին:

Ծանոթություն. *Սույն որոշումը կարող է բողոքարկվել դատական կարգով՝ այն ստանալու օրվանից մեկամսյա ժամկետում: Սույն որոշումն օրինական ուժի մեջ է մտնում սույն կետով նախատեսված բողոքարկման ժամկետն անցնելուց հետո:*

ՀՀ փաստաբանների պալատի խորհրդի
կարգապահական գործով
նիստը նախագահող՝

Տիգրան Խուրշուդյան

**07 հուլիսի 2018թ.
թիվ ԿԳ/124-Ա
ք. Երևան**